

Aalisarsinnaanermut akuersissutit pisassiissutillu pillugit Namminersorlutik Oqartussat nalunaarutaat

Aalisarneq pillugu Inatsisartut inatsisaanni nr. 29, 23. maj 2024-meersumi § 6, imm. 3, § 7, imm. 1, § 12, imm. 1, § 14, imm. 1, § 15, nr. 3-6 aamma 8, § 18, imm. 2, § 23, § 24, imm. 1, § 25, imm. 3, oqaaseqatigiit aappaat aamma § 68, imm. 2 naapertorlugit aalajangersarneqarput:

Kapitali 1

Atuuffia nassuiaatillu

Atuuffi

§ 1. Nalunaarut manna atorineqassaaq inuussutissarsiutigalugu aalisarneq ukuninga ingerlanneqartillugu:

- angallatit Kalaallit Nunaanni nalunaarsorsimasut,
- qimussit,
- angallatit nunanit allaneersut atorlugit Kalaallit Nunaata aalisarnikkut oqartussaaffigisaani aalisarnermi, aamma
- angallatit nunanit allaneersut kalaallit pisassiissutaannik Kalaallit Nunaata aalisarnikkut oqartussaaffigisaata avataani aalisartut.

Imm. 2. Nalunaarut tamatumani saniatigut atorineqassaaq, saarullinnik inuussutissarsiutigalugu aalisarnermi tunisinissamut akuersissummik peqartunut, § 21 naapertorlugu.

Nassuiaatit

§ 2. Nalunaarummi matumani uku imatut paasineqassapput:

- "Aalisarneq pillugu inatsit": Aalisarneq pillugu Inatsisartut inatsisaat qaqugukkulluunniit atuuttoq.
- "Tunngaviusumik killeqarfik": Tunngaviusumik killeqarfik, Kalaallit Nunaata kisimiilluni aningaasarsiornikkut oqartussaaffigisaa pillugu Statsministereqarfup nalunaarutaani aalajangersakkat.
- Uuttuut "BT": Angallatip tamakkiisumik usitussusaanut uuttuutip allagartaa malillugu usit oqimaannerpaaffiat.
- Uuttuut "a.t.t.": Angallatip tamakkiisumik takissusaa, angallatip isorpiaaniit aqorpiaanut qeqqa atuarlugu uuttortarneqartoq (angallatip tamakkiisumik takissusaa).

- 5) "Tunisisussaataaneq": Akuersissummut piumasaqaatit, pisat amerlassusaannik aalajangiisuusut, Kalaallit Nunaanni nunami suliffissuarmut suliareqqinneqarsimanatik tunineqartussat.
- 6) "Taamaaqataanik akuersissut": Aalisagaqatigiinnut assigiinnut aalisariutinullu assigiinnut, avataani imaluunniit sinerissap qanittuani aalisartut, aalisarnissamut akuersissut.
- 7) "Umiatsiaaraq": Aalisariutit sulluunniit 6 meterit takitigisut naannerusulluunniit, aalisarnermi atorineqartut.
- 8) "Attartornissamik isumaqatigiissut": Angallammik attartornissaq pillugu isumaqatigiissut, inuttaqartillugu (nalunaquttap akunnikkaartumik attartorneq) imaluunniit inuttaqartinnagu (marloqiusamik nalunaarsukkamik attartorneq), piffissami aalajangersimasumi aalajangersimasumik aalisarnermut atugassaq.
- 9) "PNNP-mik aqqissuussaq": Aqutsiffik aalisarnermut inatsimmi kapitali 7-imi pineqartoq.
- 10) "Paggatassiineq": Pisineqarsinnaasunit tamarmiusunit (TAC) aalajangersaaffigineqarsimasunik aalisarneq, ingerlataqartunullu ataasiakkaanut pisassat amerlanerpaaffilerneqarsimanngitsut.

Kapitali 2

Akuersissut aamma piumasaqaatit

§ 3. Inuusutissarsiutigalugu aalisarneq aamma inuusutissarsiutigiginagu akuersissummik peqarnissamik piumasaqaatitaqarluni aalisarneq, taamaallaat Aalisarnermut Naalakkersuisumit tunniunneqarsimasumik akuersissummik peqarluni pisinnaavoq.

Imm. 2. Akuersissut ingerlatsisunut aalisarnermut inatsimmi kapitali 2-mi aalisarsinnaanermut piumasaqaatinik eqquutsisunut taamaallaat tunniunneqarsinnaavoq.

Imm. 3. Akuersissut ingerlataqartumut aalajangersimasumut ataatsimut tunniunneqartarpoq kiisalu aalisarnermut aalajangersimasumik ataatsimik arlalinnilluunniit angallateqartumut, taamaattoq § 7, imm. 4 takuuk.

Imm. 4. Akuersissummik pigisaqartoq akuersissummut naapertuuttumik angallammik aalisarnermut atorineqartumik piginnittuussaaq. Taannali attartortitsinissamik isumaqatigiissuteqarnerni atuutissanngilaq, takuuk aalisarnermi inatsimmi § 11, imm. 2 aamma Nalunaarummi matumani kapitali 7.

Imm. 5. Inuusutissarsiutigalugu aalisarnermi kiisalu inuusutissarsiutigiginagu aalisarnermi, aalisarnermi akuersissuteqarfusuni aalisarnermi taamaallaat Aalisarneq pillugu inatsimmi § 3, imm. 1, nr. 12 naapertorlugit angallatit pillugit nassuiaammi ilaatinneqartut kisiisa atorlugit aalisartoqarsinnaavoq.

§ 4. Aalisarnermut Naalakkersuisoq akisussaasuusooq akuersissummik tunniussinermini inatsimmi aalajangersagaareersut saniatigut piumasaqaatinik atugassarititaasunillu allanik aalajangersaasinnaavoq, matumani tunisisussaataaneq aalisarnermut aalajangersakkat ilanngullugit.

§ 5. Aalisarnerup aallartinnissaa, nanginneqarnissaa ingerlateqqilernissaalu sioqqullugit akuersissummut tunngasunik allannguinerit tamakkerlutik Aalisarnermut Naalakkersuisumit akisussaasuusumit akuerineqassapput, matumani piginnittuunermut tunngasut allannguutaat aamma akuersissummut attuumassuteqartut angallatinik tamanik taarsiinerit ilanngullugit.

§ 6. Akuersissummik pigisaqartup akuersissut taassumaluunniit nuutinnera, matumani nuutinnera qarasaasiakkoortoq ilanngullugu, aalisarnerup nalaani angallammiitissavaa.

Kapitali 3

Angallatinut piumasaqaatit

§ 7. Angallat a.t.t. 9,4 meter-imit takinerusooq nalunaarsorneqareersimangitsoq, inuussutissarsiutigalugu aalisarnermut atorneqartussatut kissaataasoq, aalisarnerup aallartinnissaa sioqqullugu siunertamut tassunga Aalisarnermut Naalackersuisumit akisussaasumit akuerineqarsimassaaq.

Imm. 2. Angallammik, imm. 1 naapertorlugu akuersissuteqarnissaaq pillugu apeqqummik suliarinnineq, allaganngorlugu qinnuteqarnikkut pissaaq.

Imm. 3. Aalisarnissamut periarfissiissutaasunut angallatip aalisarnermi piginnaasai naleqqussarneqarsimasutut nalilerneqareerpata, angallat aatsaat akuerineqarsinnaavoq.

Imm. 4. Aalisarnermut Naalackersuisup akisussaasusup akuersissummi nalunaarsorneqarsimasumiit angallammik allamik atuisoqarnissaa akuerigallarsinnaavaa, motooriiarnerup, amutsivimmi qaqitseqqanerup assingusumilluunniit pisup tamanna ajornartingippagu aamma piumasaqaatit imm. 3-miittut imaluunniit kapitali 7-miittut eqquutsinneqarsimappata.

Imm. 5. Naalagaaffimmut atassuteqarnermut allagartap uuttuutaanullu allagartap nuutinneri qinnuteqaammut kakkiunneqassapput, taamaattoq § 10 takuuk.

Imm. 6. Angallat tamatuma kingorna uuttortaqqinneqarpat, motooria pingaarneq taarserneqarpat allatulluunniit annertuumik allannortinneqarpat, uuttuutaa eqqortoq nutaaq nassiunneqassaaq. Uuttuummut allagartap tiguneraniit kingusinnerpaamik ullorsiutini ullut 14-it qaangiutsinnagit nassiussisoqassaaq.

§ 8. Angallatip piginnittua, § 7 naapertorlugu, atia imaluunniit umiarsualivimmi sumiiffimmut attuumassutaanut normua akuersinerup kingorna allannorpat, naalagaaffimmut atassuteqarnermut allagartap tiguineqarneranit ullut 14-it qaangiutsinnagit naalagaaffimmut attuumassuteqarnermut allagartaq eqqortoq nutaaq nassiunneqassaaq. Angallatip aalisarnerata nalaani, piginnittup allannornera pisinnaanngilaq. Angallammik piginnittup akuersissutaani allannguut allanneqarsimatinnagu, angallat aalisarnermut atoqqusaassanngilaq.

§ 9. Avataasiorluni sinerissalluunniit qanittuani atugaasup angallatip piginnittua allannorpat, pisinermut isumaqatigiissut pisisumit tunisisumillu atsiorneqarsimasooq uppersarsaataagallartutut akuerineqassaaq, naalagaaffimmut attuumassuteqarnera pillugu uppersarsaatip nutaap tunniunneqarnissaata tungaanut.

Kapitali 4

Akuersissutit suussusaat

Piffissamut killiikkamut akuersissut, amerlanerpaanik pisaqarnissamut akuersissummik ilaqartoq

§ 10. Piffissamut killilikkamut akuersissut, matumani amerlanerpaanik pisaqarnissamut akuersissummik ilaqarteq aamma § 12 naapertorlugu pisassiissutit niuerutigineqarsinnaasut nammineq pigisat pillugit aaqqissuussinermut ilaangitsoq, tassaavoq inuussutissarsiutigalugu aalisarnermut tunngavissaatitaasoq, tulliuuttut atorlugit ingerlanneqartumut:

- 1) angallat 120 BT sinnerlugit angissusilik aamma angallat a.t.t. 24 meter-imit takinerusoq,
- 2) uiluinniarnermi, angallatit angissusiat apeqqutaatinnagu,
- 3) aalisarnikkut oqartussaaffiusuni, matumani nunat allat imaluunniit nunap immikkoortuini aalisarnermut suliniaqatigiiffit aalisarnermik maleruagassiornissamut piginnaatitaaffigisaanni, Kalaallit Nunaanni angallatit nalunaarsorneqarsimasut atorlugit, aamma
- 4) Kalaallit Nunaata aalisarnikkut oqartussaaffiniittut nunani allamiut angallataat atorlugit imaluunniit nunat allamiut kalaallit akuersissutaanik atuillutik Kalaallit Nunaata aalisarnikkut oqartussaaffiata avataaniittut.

Imm. 2. Piffissaa killilerlugu aalisarsinnaanermut akuersissut, tassunga pisassat annertunerpaaffilerneqarsimatillugit, taamatuttaaq nunat tamalaat imartaanni malittarisassaqartitsiviunngitsuni inuussutissarsiutigalugu aalisarnissamut tunngavissaatitaavoq.

Imm. 3. Akuersissummik tunniussinermut tunngavigineqarput aalisagaqatigiit pillugit pisassiissutit aalajangersarneqartut nalilerneqarnerat, qinnuteqartut akornanni piginnaasat annertussusiat aamma tunniussinermi piumasaqaatit Naalakkersuisunit aalajangersarneqartut, § 20, imm.1 naapertorlugu.

Imm. 4. Akuersissut ukiut pisassiiffiusut ataasiakkaarlugit tunniunneqartarpoq. Pisuni ilisimatuussutsikkut siunnersuineq ukiunut pisassiiffiusunut arlaqartunut atuuttuugaangat, ilutigisaanillu pisarineqarsinnaasunik tamarmiusunik ukiunut arlalinnootumik aalajangersaasoqaraangat, ukiunut pisassiiffiusunut arlalinnut atuuttumik akuersissummik tunniussisoqarsinnaavoq.

Piffissamut killilikkamut akuersissut, amerlanerpaanik pisaqarnissamut akuersissutitaqanngitsoq

§ 11. Piffissamut killeqartumut pisarineqarsinnaasut amerlanerpaaffilernagit ("paggatassiissutinik aalisarneq") akuersissut, tassaavoq ingerlataqarnissamut tunngavissaatitaasoq tulliuuttunik:

- 1) aalisagaqatigiinnik inuussutissarsiutigalugu aalisarnermut, matumani pisassiissutit aalisarneqartut Kalaallit Nunaanni angallatit nalunaarsorneqarsimasut ataatsimoorussarisat,
- 2) angallatinik a.t.t. 6 meter-inik naannerusunik atuilluni inuussutissarsiutigalugu sinerissap qanittuani aalisarneq, taamaattoq § 11, imm. 1, nr. 3 aamma § 13, imm. 1, nr. 4 aamma 5 naapertorlugit,
- 3) pisuni immikkuullarissuni angallatinik Kalaallit Nunaanni nalunaarsorneqarsimasunik inuussutissarsiutigalugu aalisarneq, matumani ilisimatuussutsikkut siunnersuineq pisassiissutinik aalajangersaanissamut peqqutissaqartitsilinngippat, aamma
- 4) Kalaallit Nunaata aalisarnermut oqartussaaffigisaani nunat allamiut angallataat atorlugit inuussutissarsiutigalugu aalisarneq.

Imm. 2. Imm. 1, nr. 1-3 naapertorlugit akuersissummik tunniussineq, § 13 - § 17-imi maleruagassat malillugit pisassaaq.

Imm. 3. Akuersissut ukiut ataasiakkaarlugit tunniunneqartassaaq. Pisuni ilisimatuussutsikkut siunnersuineq ukiunut pisassiiffiusunut arlaqartunut atuuttuugaangat, ilutigisaanillu pisarineqarsinnaasunik tamarmiusunik ukiunut arlalinnootumik aalajangersaasoqaraangat, ukiunut pisassiiffiusunut arlalinnut atuuttumik akuersissummik tunniussisoqarsinnaavoq.

Pisassiissutininik niuerutigineqarsinnaasunik nammineq pigisaqarluni aalisarnermut akuersissut (PNNP-mik aaqqissuussineq)

§ 12. PNNP-mik aalisarnissamut akuersissuteqarnissaq aalisarnissamut tunngavissaatitaavoq

- 1) Kitaani Tunumilu raajarniarnermut, angallatip angissusia apeqquataatinnagu
- 2) Kitaani Tunumilu avataani qaleralinniarluni aalisarnermut,
- 3) angallatit a.t.t. 6 meter-mit takinerusut atorlugit sinerissap qanittuani qaleralinniarluni aalisarnermut,
- 4) angallatit a.t.t 6 meter-iusut imaluunniit tassannga naannerusut atorlugit aqutsiveqarfik 47-mi qaleralinniarluni aalisarnermut, ingerlatsisoq pisassiissutininik niuerutigineqarsinnaasunik nammineq pigisanik aaqqissuussinermik atuisuuppat, imaluunniit
- 5) Kitaani saattuarniarluni aalisarnermut, angallatip angissusia apeqquataatinnagu.

Imm. 2. Aqutsiveqarfimmi 47-mi sinerissap qanittuani qaleralinniarluni aalisarnermi, ingerlatsisut a.t.t 6 meter-iusut imaluunniit tassannga naannerusut atorlugit, pisassiissutininik niuerutigineqarsinnaasunik nammineq pigisanik aaqqissuussinermut ilaassanerluni imaluunniit paggatassiissutininik aalisarnermut ilaaginnassanerluni ingerlatsisup toqqarsinnaavaa, § 11 naapertorlugu.

Imm. 3. Piginnittup pisassiissutininik pisassai akuersissummut allanneqassapput aamma ingerlatsisumut pisassiissutininik pisassaasa attuumassutillit ukiunut qulinoortumik amerlassuserisassa at allanneqassapput, taakku atuuttussaapput pisassiissutininik pisassat tunniunneqarsimasut pissarsiarinerat ilanngaataallu ilanngullugit.

Imm. 4. Pisassiissutininik niuerutigineqarsinnaasunik nammineq pigisanik atulluni aalisarsinnaanermut akuersissummut attuumassutilimmik, ukiut tamaasa ukiup pisassiiffiusup aallartinnissaa sioqqullugu ukiumoortumik pisassat pillugit nalunaarut, ukiumut pineqartumut amerlassutsimik nalunaarneqartumik aamma pigineqaratarsinnaasumik tunisassiorsinnaanermut akuersissummik kiisalu angallat atorineqartussa q pillugit paasissutissiinermik ilaqartoq tunniunneqassaaq.

Kapitali 5

Akuersissummik qinnuteqarneq

Piffissamut killilikkamut akuersissut, amerlanerpaanik pisaqarnissamut akuersissutitaqanngitsoq

§ 13. Akuersissut, § 11, imm. 1, nr. 1 – 3 naapertorlugit, ukiup siuliani taamaaqataanik akuersissuteqarsimasumut eqquutsitsisumut akuersissut taamaallaat tunniunneqassaaq, kiisalu ingerlatsisunut imm. 2 naapertorlugu immikkut ittumik akuersissummik pissarsisimasumut imaluunniit piumasaqaatinut § 15 imaluunniit § 16-imiittunik eqquutsitsisimasunut. § 14 naapertorlugu qinnuteqaammik tunngavissinneqartumik akuersissut tunniunneqassaaq.

Imm. 2. Qinnuteqartoq, imm. 1 naapertorlugu qinnuteqarsimannginneq peqputigalugu akuersissummik tunineqarnissamut pisinnaatitaaffimminik annaasaqarsimasooq, immikkut ittumik akuersinermik Naalakkersuisut nalunaaruteqarfigninnaavaat, tamanna makkuninnga peqquteqarpat:

- 1) qinikkatut suliaqarneq,
- 2) inuussutissarsiorfiit kattuffiini siulersuisuni sulineq,
- 3) Qinnuteqartup ilinniarnera imaluunniit ilinniartunngungajalernera,

- 4) umiiaqqaneq,
- 5) amutsivimmiinneq,
- 6) sivitsortumik napparsimaneq,
- 7) qinnuteqartup ilaqquttatut qaniginerpaasaani toqusoqarnera imaluunniit pinartorujussuarmik napparsimasoqarnera, imaluunniit
- 8) tunitsivissanik amigaateqarneq.

Imm. 3. Imm. 3 naapertorlugu immikkut ittumik akuersissuteqartoqassappat taava pisup pineqartup pisimaneranut peqqissaarussamik uppersaammik ilaqartumik qinnuteqaammik nassiussisoqarneratigut taamaallaat immikkut ittumik akuersissummik tunniussisoqarsinnaavoq.

§ 14. Angallammik a.t.t. 6 meter-imik imaluunniit tassannga naannerusumik sinerissap qanittuani aalisarnissamut akuersissummik qinnuteqaat, qinnuteqartup najugaqarfittut kommuniani qinnuteqarnermut immersuiffissamik atuilluni kommunimut tunniunneqassaaq, siunertamut tassunga atugassiaq www.sullissivik.gl-imi nassaassaavoq.

Imm. 2. Angallammik a.t.t. 6 meter-i sinnerlugu takissusilimmik sinerissap qanittuani aalisarnissamut akuersissummik qinnuteqaat, qinnuteqarnermut immersuiffissamik atuilluni Aalisarnermut Naalackersuisumut akisussaasuusumut tunniunneqassaaq, siunertamut tassunga atugassiaq www.sullissivik.gl-imi nassaassaavoq.

§ 15. Atuisunut 18-inik ukioqalereersimasunut § 14, imm. 1-imi piumasaqaatinik naammassinissimangitsunut, aalisarnermut inatsimmi aalisarsinnaalernermit piumasaqaatinik eqquutsitsisunut akuersissut nalunaarutigineqassaaq. Tamatuma saniatigut qinnuteqartup piumasaqaatit tullinguuttut naammassisimassavai:

- 1) Imarsiornermi ilinniarnermik angusiniikuuneq imaluunniit piginnaasat assingunik allatut iliorluni peqalernikuuneq, aamma
- 2) angallammik kiisalu aalisarnermut atortunik, aalisarnermi atorneqartussanik pigisaqarneq.

Imm. 2. Assingusunik piginnaaneqarnissaaq imm 1, nr 1 naapertorlugu qinnuteqartup aalisarnermik piginnaasai pillugit oqaaseqaateqartitsinikkut uppersaanikkut tulliuuttunit pissarsianit:

- 1) najugaqarfittut kommuni,
- 2) najukkami aalisarnermut piniarnermullu peqatigiiffik,
- 3) inuk aalisarnissamut akuersissummik pigisaqartoq, qinnuteqartullu aalisaqatigisimasaa, imaluunniit
- 4) maanna sulisitsisorisaq siusinnerusukkulluunniit sulisitsisuusimasoq.

Imm. 3. Qinnuteqartoq inuusutissarsiutigalugu piniarnermut imaluunniit inuusutissarsiutigalugu aalisarnermut akuersissutaateqarpat siornatigulluunniit akuersissutaateqarsimappat, qinnuteqartup assingusunik piginnaasaqarneranik nalilersuinermi imm. 2 naapertorlugu tamanna ilaassaaq.

Imm. 4. Naalackersuisut akuersissutinik nutaanik tunniussisarneq unitsissinnaavaat, aalisarnermi pineqartumi pisuussutit aalisarsinnaassutsillu akornanni pissutsit tamanna pissutissaqartippassuk.

§ 16. Qinnuteqartut, Qaanaami Tunumiluunniit najugaqartut, § 13, imm. 1 naapertorlugu ukiup siuliani akuersissummik peqarsimanissaannik piumasaqaammut kiisalu § 15, imm. 1-imi piumasaqaammut ilaangillat.

§ 17. Aalisarnermut Naalackersuisoq akisussaasuusoq § 15 naapertorlugu nalilersuinermit atugassanik, qinnuteqartoq pillugu paasissutissanik pisariaqartumik ilassutaasussanik pissarsiniarsinnaavoq, ukunannga:

- 1) angerlarsimaffittut kommuni,
- 2) najukkami aalisartut piniartullu peqatigiiffiat, aamma
- 3) siusinnerusukkut maannaluunniit sulisitsisorisaq.

§ 18. Naalackersuisut aalisarnernut ataasiakkaanut piumasaqaatinik immikkut itturnik aalajangersaasinnaapput, taakku qinnuteqartup akuersissummik tunineqassaguni aamma eqquutsissavai.

Piffissamut killilikkamut amerlanerpaanik pisaqarnissamik ilaqartumut akuersissummik, avataasiorluni aalisarnermut akuersissummik tunniussineq

§ 19. Avataasiorluni aalisarnissamut akuersissummik qinnuteqaat, avataasiorluni aalisarnissamut qinnuteqarnermi immersuiffissiamik atuilluni Aalisarnermut Naalackersuisumut akisussaasumut tunniunneqassaaq, taanna www.sullissivik.gl-imi nassaassaavoq.

Imm 2. Imm. 1 naapertorlugu Aalisarnermut akuersissummik qinnuteqaat, ukiup ullorsiuteqarfiusup akuersissummik qinnuteqarfiusup aallartinnissaa sioqqullugu, 1. november nallertinnagu Aalisarnermut Naalackersuisumut akisussaasuusumut apuunneqareersimassaaq.

Imm. 3. Imm. 1-imi aalajangersagaq, aalisarnernut PNNP-mut aaqjissuussinermiittunut ilaanngilaq.

§ 20. Aalisagaqatigiinnut pisassiissutit Naalackersuisut agguaattarpaat tulliuuttut iliorlutik:

- 1) Pisassiissutit agguaanneqassapput umiarsuaatileqatigiiffinnut, ukiup siuliani pisassiissutinik peqarsimasunut aamma aalisagaqatigiinnut ataasiakkaanut pisarineqarsinnaasut tamarmiusut ilaannit umiarsuaatileqatigiiffiit ataasiakkaat pigisaannit aallaaveqartumik, tassami umiarsuaatigiiffiup pisassiissutinit pisarisimasai piviusut mianerineqarsinnaammata.
- 2) Nr. 1 malillugu agguaassinerup kingorna pisassiissutinit sinneruttoqarpat, pisassiissutit umiarsuaatileqatigiinnut pioreersunut imaluunniit Aalisarnermut Naalackersuisup akisussaasuusup nalilersuinerata kingorna umiarsuaatileqatigiinnut nutaanut agguaanneqarsinnaapput. Naliliinermit ilaatigut umiarsuaatileqatigiiffiit immikkut pisassiissutinik pisariaqartitsisinnaanerat, aalisarnerup nunap ilaani ineriartornera, umiarsuaatileqatigiiffiit aningaasaqarnikkut patajaatsuunissaannik qulakkeerinninnissaaq mianerineqarsinnaapput, matumani umiarsuaatileqatigiiffiit nutaat ukioq naallugu aningaasarsiornikkut patajaassuilimmik aalisarnissaat kiisalu inuiaqatigiit aningaasaqarnikkut pitsaanerpaamik iluanaaruteqarnissaat ilanngullugit.

Imm 2. Tamakkiisumik pisassiissutinik atuinissap qulakkeernissaa siunertarlugu, suliaqartunit akuusunit akuersissuteqarneq atorlugu Aalisarnermut Naalackersuisoqarfik akisussaasuusoq, pisassiissutinik agguaasseqqissinnaavoq.

Inuussutissarsiutiginnagu sinerissap qanittuani aalisarsinnaanermut akuersissummik tunniussineq

§ 21. Inuussutissarsiutigiginagu aalisartunut saarullinnik pisassiissutinik, tulaanneqartussanik Naalakkersuisut aalajangersaasinnaapput. Pisassiissutinit taakkuninnga aalisarnissaq, akuersissummik piunasaqaateqarpoq.

Imm. 2 Saarullinnik tunisisinnaanermut akuersissut, qinnuteqartup angerlarsimaffittut kommunianit tunniunneqassaaq.

Imm. 3. Inuussutissarsiutigiginagu aalisartunut saarullinnik tulaassisinnaanerannut akuersissut, ingerlatsisunut akuersissut nalunaarutigineqassaaq, tulliuuttunut:

- 1) Aalisarneq pillugu Inatsisartut inatsisaanni § 9-mi pissarsinnaanermut piunasaqaatinik eqquutsitsisunut,
- 2) 18-nik ukioqalereersimasut,
- 3) uppernarsaatinik nassiunneqartunik tamanik ersarissumik atuarneqarsinnaasumillu immersuisimasunut.

Imm. 4. Inuussutissarsiutigiginagu aalisartoq saarullinnik tulaassisinnaanermut akuersissummik pigisaqartoq, akuersissut tunitsivimmuk takutittassavaa.

Imm. 5 Inuussutissarsiutigiginagu saarullinnik tulaassinissamut akuersissuteqarluni aalisarnermi taamaallaat atorineqarsinnaapput aalisaatit, qissattaatit imaluunniit ningittakkat. Ningittakkanut qarsorsat amerlanerpaamik 50-it ikkunneqarsinnaapput.

Kapitali 6

Aalisarnerit ilaannut immikkut atuuttut

Sinerissap qanittuani qaleralinniarluni aalisarneq

§ 22. Aalisarnermut Naalakkersuisoq akisussaasuusoq, sinerissap qanittuani qaleralinniarluni aalisarnermut akuersissutinik ima ittunik tunniussisinnaavoq:

- 1) Aqutsiveqarfik 47-mi PNNP-mik aaqqissuussinermi, § 12 naapertorlugu aalisarnermut akuersissut.
- 2) Aqutsiveqarfinni tamani angallatinut a.t.t. 6 meter-imik tassanngaluunniit naannerusunut § 11 naapertorlugu paggatassiilluni aalisarnermut akuersissutit.

Imm. 2. Aqutsiveqarfimmi 47-mi akuersissummik pigisaqartoq, tamatuma ilutigisaanik aqutsiveqarfinni allani qaleralinniarluni aalisarnissamut akuersissummik tunineqarsinnaanngilaq.

Imm. 3. Aqutsiveqarfup 47-p avataaniittumi akuersissummik pigisaqartoq, tamatuma ilutigisaanik aqutsiveqarfimmi 47-mi qaleralinnik aalisarnissamut akuersissummik tunineqarsinnaanngilaq.

§ 23. Aqutsiveqarfimmi 47-mi qaleralinniarluni aalisarnermut akuersissut Qeqertarsuup Tunuani, Uummannami Upernavimmilu (aqutsiveqarfup immikkoortuini) atorineqarsinnaavoq.

Imm. 2. Aqutsiveqarfik 47-miunngitsumi aqutsiveqarfinnut allanut akuersissut, sinerissap qanittuani aqutsiveqarfinni allani atorineqarsinnaavoq, kisiannili aqutsiveqarfik 47-miunngitsaq.

Imm. 3. Ukiumi pineqartumi aqutsiveqarfimmi 47-mi aqutsiveqarfup immikkoortuini pisassiissutit tamarmiusut aalisarneqarlutik nunguppata, ingerlatsisoq aqutsiveqarfup immikkoortuani allami pisassiissutit aalisarneqarlutik nungunngiffianni aalisarnerminik nangitsisinnaavoq.

Nipisat

§ 24. Aqutsiveqarfinni pingaarutilinni nipisannut pisassiissutinik ukiut tamaasa Naalakkersuisut aalajangersaasarput.

Imm. 2. Ukiumi pisassiiffusumi ataatsimi aqutsiveqarfinnut marlunnut akuersissummik qinnuteqartoqarsinnaavoq, qinnuteqartup angerlarsimaffeqarfigisaani aqutsiveqarfimmut qaninnerpaamut aamma aqutsiveqarfimmut saniliusumut.

§ 25. Nipisannik arnarlunnik inuussutissarsiutigalugu aalisarneq piffissami aalisarfiusussami taamaallaat akuerisaavoq, tamanna Aalisarnermut Naalakkersuisumit akisussaasuusumit aalajangersarneqartarpoq.

§ 26. Aqutsiveqarfinnut ataasiakkaanut tamanut pisassiissutit pillugit nalunaarutit, Aalisarnermut Naalakkersuisumit akisussaasuusumit tusagassiorfiit aamma Naalakkersuisut nittartagaat aqutigalugit nalunaarutigineqartassapput. Taamatuttaaq pisassiissutit tamakkerlutik pizarineqarsimagaangata tamanna nalunaarutigineqartassaaq, § 45 naapertorlugu.

Imm. 2. Aqutsiveqarfimmi piffissap aalisarfiusussap qaangiunnerata kingorna, pisassiissutit tamakkerlugit pizarineqarsimangikkaangata, Aalisarnermut Naalakkersuisup akisussaasuusup pisassiissutit pizarineqarsimangitsut aqutsiveqarfimmut allamut nuussinnavai.

Imm. 3. Aqutsiveqarfimmi pineqartumi nipisanniarluni aalisarnerup aallartinnissaa kingusinnerpaamik sapaatip akunneranik sioqqullugu, piffissat aalisarfiusussat Aalisarnermut Naalakkersuisup akisussaasuusup tamanut saqqummiuttarpai.

Kapisillit

§ 27. Inuussutissarsiutigalugu kapisilinnik aalisarneq akuersissummik piumasaqaatitaqarpoq, taanna Aalisarnermut Naalakkersuisumit akisussaasuusumit qinnuteqarnerup kingorna tunniunneqartarpoq.

Imm. 2. Akuersissut qinnuteqartunut piumasaqaatinik tulliuuttunik eqquutsitsisunut taamaallaat tunniunneqarsinnaavoq:

- 1) Qinnuteqartoq nammineerluni kapisilinnut qassutinik angallammillu pigisaqassaaq.
- 2) Qinnuteqartut siornaammat piffissami aalisarfiusumi akuersissummik peqarsimasut, siornaammat piffissami aalisarfiusumi nalunaaruteqarnissamut pisussaaffimmik eqquutsitsisimassapput.

§ 28. Inuit inuussutissarsiutigalugu aalisarnermut akuersissummik pigisallit kisimik kapisilinnik tuniniaasinnaapput. Najukkami kalaalimineerniarfimmi najukkamilu suliffeqarfinnut taamaallaat kapisilinnik tuniniaasoqarsinnaavoq.

§ 29. Inuussutissarsiutigalugu aalisarneq eqqarsaatigalugu Naalakkersuisut ukiut tamaasa kapisilittassanik aalajangersaassapput, kapisillit piujuartinnissaat amerliartornissaallu siunertaralugu nunat tamalaat akornanni isumaqatigiissutit mianeralugit.

§ 30. Kapisillit pizarineqartut tamakkerlugit umiarsualivimmut tulannerup kingorna, erngertumik KANUAPNA-mut nalunaarutigineqartassapput.

Imm. 2. Aalisartut kapisilinnik inuussutissarsiutigalu aalisarnermut akuersissummik pigisallit kalaalimineerniarfimmi toqqaannartumik tuniniaanermi, kapisilinnik tulaassinerit tamaasa nalunaaruteqartassapput. Kapisillit pisinineqartut tamakkerlutik nalunaarummut ilaatinneqassapput. Pisat pillugit nalunaaruteqarneq, nalunaarummut uunga ilanngussaq 2 naapertorlugu paasissutissanik imaqassaaq.

§ 31. Kapisilinnik aalisarnissamut akuersissummik pigisallit kapisilinniarlutik aalisarsimangitsut, imm. 3 naapertorlugu tamanna nalunaarutigissavaat.

Imm. 2. Kapisilinnik aalisarnissamut akuersissummik pigisallit kapisilinniarlutik aalisarsimasut, kapisilinnilli pisaqarsimangitsut, imm. 3 naapertorlugu tamanna nalunaarutigissavaat.

Imm. 3. Akuersissutinik atorineqanngitsunik imm.1 aamma imm. 2 naapertorlugit pisaqarsimanginneq pillugu nalunaarutiginninneq, nalunaarummut uunga ilanngussaq 2 malillugu imaluunniit Sullissivik.gl aqqutigalugu pissaaq. Nalunaaruteqarneq kapisilinniarluni aalisarnerup matuneqarnerata kingorna, kingusinnerpaamik ullut 14-it qaangiunneranni KANUAPNA-mut nassiunneqarsimassaaq.

§ 32. Kapisillit kuuani kapisilinniarluni aalisarneq inuussutissarsiutiginnagu aalisarnermut sukkulluunniit aalajangersakkat atuuttut aqqutigalugit maleruagassiorfigineqartarput.

Uiluut

§ 33. Aqutsiveqarfinnut tulliuuttunut tamanut uiluinnik pisassiissutit ukiut tamaasa Naalakkersuisut aalajangersartarpaat:

- 1) Nuuk.
- 2) Aqajarua.
- 3) Attu.
- 4) Sisimiut-Kujataa (Saqqaq).
- 5) Sisimiut-Avannaa (Kangaarsuk).
- 6) Nassuttooq.

§ 34. § 33-mi aalajangersarneqarsimasuni aqutsiveqarfinni arfinilinni taakkunani inuussutissarsiutigalugu uiluinniarluni aalisarnermut akuersissutinik Aalisarnermut Naalakkersuisoq akisussaasuusoq tunniussisinnaavoq.

§ 35. § 20 malillugu uiluinnik pisassiissutit agguanneqartarput.

Kapitali 7

Angallatinik attartorneq

Tamanut tunngatillugu

§ 36. Umiarsuaatileqatigiiffik § 7, imm. 3 apequtaatinnagu, pisuni immikkut ittuni qinnuteqartoqarnerata kingorna, inuussutissarsiutigalugu aalisarnerup ingerlannissaanut angallammik

Kalaallit Nunaanni pigineqartumik utaqqiisaasumik attartornissamut Aalisarnermut Naalackersuisumit akisussaasuumit akuersissummik pissarsisoqarsinnaavoq. Pisut immikkut ittut tassunga atatillugu imaattutut isigineqarput:

- 1) umiarnikuuneq assigisaaluunniit, aamma
- 2) Pisassiissutinit pisassanit akuersissutit angallammut aalajangersimasumut attuumangippata aammalu aalisarnermut inatsimmi § 36, imm. 1-mi aamma § 37, imm. 1-milu taaneqartutut piffissaliussat qaangerneqarsimatinnagit.

Imm. 2. Piffissaq attartorfussatut akuerisaasoq, pisuni ataasiakkaani qaammatinik pingasunik sivilunerussanngilaq.

Imm. 3. Qinnuteqaat makkuninnga imaqaassaaq:

- 1) qinnuteqaammut tunngavilersuut,
- 2) pisut immikkut ittut nassuiaataat, aamma
- 3) attartornermut isumaqatigiissut atsiugaq, oqartussaasut akuersissutaannik, imm. 4 naapertorlugu taamaallaat piumasaqaateqartoq.

Imm. 4. Attartornissamut isumaqatigiissummi nalunaarneqassapput:

- 1) illuatungiusoq attartortitsisoq aamma illuatungiusoq attartortoq,
- 2) angallatip pineqartup aqqa ilanngullugu, radiokkut ilisarnaataa aamma nammineq illoqarfigisap umiarsualiviata ilisarnaatitut normua,
- 3) akuersissutit kalluarneqartut, kiisalu
- 4) piffissap attartorfusup ulloq aallartiffia naaffialu.

§ 37. Inuussutissarsiutigalugu misileraalluni aalisarnissamut akuersissummik pigisalik, angallammik Kalaallit Nunaanneersumik attartorluni misileraalluni aalisarnerup ingerlannissaanut akuersissummik Aalisarnermut Naalackersuisumut akisussaasumut qinnuteqarsinnaavoq.

Imm. 2. Attartornissamik isumaqatigiissutip nuutinnera qinnuteqartup nassiutissavaa, tassani nalunaarneqassapput:

- 1) illuatungiusoq attartortitsisoq aamma illuatungiusoq attartortoq,
- 2) piffissap attartorfiup ulloq aallartiffia naaffialu,
- 3) angallatip aqqa aamma siusinnerusukkat aqqa/aqqi,
- 4) angallatip piginnittuata aqqa najugaalu,
- 5) angallatip IMO-normua, aamma
- 6) angallatip naalagaaffimmut angerlarsimaffeqarneranut uppernarsaat, uuttuutitut allagartat kiisalu angallatip IMO-mi normumik peqarneranut uppernarsaat.

Imm. 3. Ulloq naaffusussatut nalunaarutigisaq sioqqullugu attartornissamik isumaqatigiissut atorunnaarsinneqarsimassappat, qinnuteqartup tamanna Aalisarnermut Naalackersuisumut akisussaasumut erngertumik nalunaarutigissavaa.

§ 38. Qinnuteqartoq nunami tulaassivimmik ingerlataqartoq, angallammik tunitsivittut utaqqiisaasumik atorneqarsinnaasumik, Aalisarnermut Naalackersuisumut akisussaasuumut akuerineqarluni angallammik attartorsinnaavoq, umiarsuarnut tunitsivinnut nalunaarummi piumasaqaatinik angallat eqquutsitsisimappat.

Imm. 2. Qinnuteqaammut paasissutissat tulluuttut kakkiunneqassapput:

1) Attartornissamik isumaqatigiissutip nuutinnera, tassani taaneqarsimassapput illuatungiusoq attartortitsisoq aamma illuatungiusoq attartortoq, attartornissamik isumaqatigiissutip sivilissusia ullumik aallartiffimmik unitsitsiffimmillu ilaqartoq, angallatip atia aamma siusinnerusukkut atia/atii, angallatip piginnittuata atia najugaalu, angallatip nuna erfalasoqarfia kiisalu IMO-mi normua.

2) Nunami sorlermi najugaqartuunermut uppersaatip nuutinnera

3) Angallatip uuttuutaanut allagartap nuutinnera

4) Angallat IMO-normumik peqarneranut uppersaat.

Imm. 3. Ulloq naaffusussatut nalunaarutigisaq sioqqullugu attartornissamik isumaqatigiissut atorunnaarsineqarsimassappat, qinnuteqartup tamanna Aalisarnermut Naalackersuisumut akisussaasuumut erngetumik nalunaarutigissavaa.

§ 39. Angallatip Kalaallit Nunaanneersup attartornissamut isumaqatigiissummik ataasiinnarmik imaluunniit pisut ataasiakkaarlugit isumaqatigiissuteqarsinnaavoq.

§ 40. Angallat attartornissamik isumaqatigiissummumut ilaasoq, piffissami pineqartumi tassani akuersissutitut, akuersissummik pigisalinnut assigiinngitsunut, ilaasinnaangilaq.

Imm. 2. Piffissami attartorfusumi illuatungiusup attartortitsisup akuersissummit pigisaanit, piffissami pineqartumi angallat Aalisarnermut Naalackersuisup akisussaasusup atorunnaarsissavaa.

Imm. 3. Illuatungiusoq attartortitsisoq, piffissami attartortitsiffusumi angallammik allamik attartoqusaangilaq.

§ 41. Piffissaq attartorfusooq useqarani aallartissaaq naggaserneqarlunilu.

Angallammik nunani allamiut pigisaannik attartorneq

§ 42. Aalisarnermut Naalackersuisumit akisussaasumit akuerineqarluni qinnuteqartoq inuussutissarsiutigalugu aalisarnermik imaluunniit inuussutissarsiutigalugu misileraalluni aalisarnermik ingerlatsinissamut angallammik nunami allamiut pigisaannik attartorsinnaavoq. Akuersissut tunniunneqarsinnaavoq, angallatip Kalaallit Nunaanneersut piginnaasanik pisariaqartunik, atortunik pisariaqartunik imaluunniit teknologimik pisariaqartumik pigisaqanngikkaangata.

Imm. 2. Qinnuteqartup nassiutissavai:

1) Attartornissamik isumaqatigiissutip nuutinnera, tassani nalunaarneqassapput:

a) illuatungiusoq attartortitsisoq aamma illuatungiusoq attartortoq,

b) piffissaq attartorfusooq ullormik aallartiffimmik naaffimmillu ilaqartoq,

c) angallatip aqqa aamma siusinnerusukkut aqqa/aqqi,

d) angallatip piginnittuata aqqa najugaalu,

e) angallatip nuna erfalasoqarfia kiisalu IMO-mi normua.

2) angallatip naalagaaffimmumut angerlarsimaffeqarneranut uppersaataata nuutinnera, uuttuummut allagartaq kiisalu angallatip IMO normumik peqarneranut uppersaat.

3) uppersaataat makku pillugit, angallatip VMS-imik atortoqarnera kiisalu arlaannaatigulluunniit IUU pillugu allattuiffimmiinnginnera, naalagaaffiup erfalasoqarfusup aalisarnermut oqartussaataaniit attuumassuteqartumii tamatuminnga uppersaammik qinnuteqartup pissarsineratigut.

4) uppersaatit makku, angallat naalagaaffimmut erfalasoqarfiusumut uku arlaannut ilaasortaaneranut tunngasut:

a) Atlantikup avannaani nunat killiit aalisarnikkut suliniaqatigiiffiat (NAFO),
b) Atlantikup avannaani nunat kangilliit aalisarnikkut kommissioniat (NEAFC) imaluunniit c) nunap immikkoortuani aalisarnikkut aqutsineq pillugu suleqatigiiffiat (RFMO), Naalagaaffit suleqatigiissut inuussutissalerinermi aamma nunaateqarnermi suliniaqatigiiffiat (FAO) Umiarsualivittarnerit pillugit isumaqatigiissut (PSMA) pillugu isumaqatigiissummik atuutsitsisut kiisalu FAO-p Nunarsuarmioqatigiit aalisarnikkut unioqutitsisumik nalunaaruteqartannginnerullu aalisarnerup ingerlanneqarnissaanut pinngitsoortinnissaanut pilersaarut (IUU) isumaqatigiissutaanik atuutsitsisut qinnuteqartup naalagaaffiup erfalasoqarfiusup aalisarnermut oqartussaataitaniit attuumassuteqartumiit pissarsiarissavai.

Imm. 3. Nunami allamiut angallat pigisaat ukiumi pisassiiffiusumi ingerlasumi akuersissummi atornerqartareersimappat, qinnuteqartoq uppersaatinut piumasaqaatinut imm. 2-mi, nr. 3-4-miittunut ilaassanngilaq.

Imm. 4. Ulloq naaffiusussatut nalunaarutigisaq sioqqullugu attartornissamik isumaqatigiissut atorunnaarsinneqarsimassappat, qinnuteqartup tamanna Aalisarnermut Naalakkersuisumut akisussaasuusumut erngetumik nalunaarutigissavaa.

§ 43. § 42 malillugu angallammik attartornermut akuersissut, aalisarnermut inatsisip § 1-anik aallaaveqartumik nalunaarutigineqassaaq.

Imm. 2. § 42 malillugu angallammik attartornissamut akuersissummut atatillugu, aalisarnerq pillugu inatsimmi siunertat angunissaat pitsaanerpaamik qulakkeerumallugit, Aalisarnermut Naalakkersuisoq akisussaasuusoq piumasaqaatinik aalajangersaasinnaavoq.

§ 44. Kalaallit Nunaata aalisarnermut oqartussaaffigisaata avataani aalisarnissamut angallammik Kalaallit Nunaanneersumik nunat allamiut attartornerat, Aalisarnermut Naalakkersuisumut akisussaasumut qinnuteqarnerup kingorna akuerineqarsinnaavoq, piumasaqaatit tulluuttut malillugit:

1) Imartami pineqartumi aalisarnermut isumaqatigiissummik tunngavissaqartoqarpat, aalisarnermut isumaqatigiissummi pingaarutilimmi tassani allatut aalajangersaasoqarsimanngippat, attartornermut isumaqatigiissummut ilaasumik angallat aalisaqqusaanngilaq.

2) Piffissami tassani angallat akuersissummik Kalaallit Nunaanneersumik atueqqusaanngilaq.

3) Angallat nunap allap imartaani, nunap immikkoortuani aalisarnermik aqutsinermi ingerlatsivimmit aqutsiveqartumit aalisagaqatigiinnik taamaallaat aalisarsinnaavoq, nuna pineqartoq illuatungerisat isumaqatigiissuteqarfigineqarsimappat imaluunniit nunap immikkoortuani aalisarnermik aqutsinermi ingerlatsivimmi pingaarutilimmi suleqatigalugu illuatungerisatut isumaqatigiissuteqarfigineqarsimanngippat.

Imm. 2. Piffissami attartorfiusumi illuatungerisap attartortitsisup akuersissutaanit, angallat Imm. 1, nr. 2 naapertorlugu utaqqiisaasumik peerneqassaaq. Angallatit Kalaallit Nunaanneersut attartornissamik isumaqatigiissummut ilaasut pisarisaat, illuatungerisap attartortup nunagisaani aalisagartassatut pisassiissutinit ilanngaaticineqassapput.

Kapitali 8

Aalisarnerup unitsinnera

§ 45. Pisassiissutit imaluunniit ukiumut pisassiissutit tamakkerlugit aalisarneqarpata imaluunniit piffissaq aalisarfiusussaq naappat, aalisarneq ingerlaannartumik unitsinneqassaaq aamma atortuutit tamarmik qaqqinneqassapput.

Imm. 2. Angallatinut Kalaallit Nunaanneersunut ataatsimoorussamik pisassiissutinik aalisartunut unitsitsinermut piffissaliunneqartoq pillugu pisortat nalunaaruteqarnerisigut nalunaarfigineqassapput, matumani Naalakkersuisut nittartagaatigut aamma illuatungiusunut attuumassuteqartunut toqqaannartumik nalunaaruteqarnerit ilanngullugit.

Imm. 3. Angallatit nunanit allaneersut Kalaallit Nunaata aalisarnermut oqartussaaffigisaani aalisartut tamarmik, piffissaq aalisarunnaarfissaq pillugu angallammut pineqartumut toqqaannartumik nalunaaruteqartoqassaaq. Angallatinut EU-meersunut nalunaarutip taamaaqataa EU-Kommissionimut nassiunneqassaaq. Angallatinut Kalaallit Nunaanneersuunngitsunut allanut nalunaarutip taamaaqataa, nunap pineqartup aalisarnermut oqartussaasuanut nassiunneqassaaq.

Imm. 4. Ingerlatsisut PNNP-mik aaqqissuussinermi aalisarnermut peqataasut, piffissami imm. 1-mi taaneqartumi pisanik pisiortornernik tuniniaanernillu tamanik unitsitsissapput.

Kapitali 9

Pineqaatissiissutit

§ 46. § 3, imm. 1 aamma 5-imik, §§-inik 5 aamma 6-imik, § 7, imm. 1-imik, § 8-mik, § 25-mik, § 27-mik, § 28-mik, § 30-mik, § 31-mik, § 39-mik, § 40, imm. 1 aamma 3-mik, § 41-mik, § 42, imm. 4-mik, aamma § 45, imm. 1 aamma 4-mik unioqqutitsinerit Kalaallit Nunaanni Pinerluttulerineq pillugu Inatsimmi malittarisassat naapertorlugit akiliisitsinermik arsaarinninnermilluunniit pineqaatissiissutaasinnaapput.

Imm. 2. Malitassanik, peqqussutinik aalajangiinernillu aamma atugassarititanik Naalakkersuisunit aalajangersarneqartunik unioqqutitsineq saneqqussinerilluunniit imaluunniit nalunaarummi uani § 4-mik, § 18-mik, § 34-mik, § 36, imm. 1, § 38, imm. 1, § 42, imm. 1, § 43, imm. 2 aamma § 44, imm. 1 kiisalu § 45, imm. 2 aamma 3 naapertorlugit paasissutissanik tunniussinnginnerit imaluunniit eqqunngitsunik imaluunniit paatsoorneqarsinnaasunik tunniussinerit Kalaallit Nunaanni Pinerluttulerineq pillugu inatsimmi malittarisassat malillugit akiliisitsilluni pineqaatissiissutaasinnaasut aalajangersarneqarsinnaapput.

Kapitali 10

Atuutilersitsinermut, atorunnaarsitsinermut ikaarsaariarnermilu aalajangersakkat

§ 47. Nalunaarut ullormi 15. juuli 2026 atuutilissaaq.

Imm. 2. Tamanna ilutigalugu atorunnaarsinneqarput:

- 1) Aalisarsinnaanermut akuersissutit pisassiissutillu pillugit Namminersorlutik Oqartussat nalunaarutaat nr. 10, 4. februar 2025-meersoq.
- 2) Kapisilinniarneq pillugu Namminersorlutik Oqartussat nalunaarutaat nr. 59, 1. august 2025-meersoq.

Kalaallit Nunaanni Namminersorlutik Oqartussat, ulloq 15. juuni 2026

Peter Borg (atsior.)

Aalisarnermut, Piniarnermut, Nunalerinermut Imminullu Pilersornermut Naalakkersuisoq

/Emanuel Rosing (atsior.)

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut